



Ce dì sino vuê? Ai 12, no mo? Sì, sì, propite ai 12 di Fevrâr e a mancje pôc ai 16 dal mê. E ce al sucedial al 16? Bon... bisugne fâ il versamente de IVA e des ritignudis, che po, stant che al cole di domenie, si à di fâlu lunis 17. Ma no sin chi a visâus lis scjadencis fiscâls!
Noaltris di Contecurte, il mê passât, o vin inmaneade une iniziative che cumò e sta par rivâ a la seconde puntade... **LA CONTE DAL MÊS!**

Cemût saressie a dî, ce robe ise? Otante di voaltris, là di fûr, lu san bielzà! Sì, parcè che par cumò, **te maraveose Liste di Contecurte, si son za iscris in otante di lôr**, che se o tignês cont che ta chê di prin a jerin in 8, poben... al è za un sucès, ancje se o sperin che la mail che e rive te direzion di pueste ogni lunis matine e sedi ancje un plasê e une comoditât par viodi ce contis che a son jessudis su la Osterie e se us interesse alc.

Ma la idee che nus à puartât a fâ lavorâ une vore la nestre Sartore e je stade che di **regalâus une conte al mês**. E a Zenâr la conte us è rivade puntuâl, e o sperin che us vedi plasude (e no nus displâs ve conseis e judizis tai coments). E jere une storie in teme cul mês e e fevelave di pignarûl, di fûc e di vitis che a cambiin. E l'Ostîr, ancje chest mês, i da sot par scrivi la conte di Fevrâr, che e je cuasi finide. **La Coghe, di part sô, e je daûr a meti dongje informazions sul teme che o vin sielt** par il mês plui curt dal an, che tal 2020 al è un pôc mancûl curt. Insome.... o stin lavorant par voaltris e anzit, **o vin metût ancje un biel cont par ledrôs** par stiçânus a jessi puntâls e stiçâ chei che no si son ancjemò iscrits a iscrivisi.

✘ Par cumò us disin dome **il titul de conte: LEN**.

E us disvelin ancje une altre robe. Te conte di Zenâr, vês di perdonâlu, l'Ostir al veve falât un non. Po ben... al à pensât di corezile e **par ducj chei che si son iscrits te liste ur mandarâ la maniere di scjamâ la version corezude de conte** (dome chei di Zenâr a puedin fracâ il leam, clare ☐)

E us disin ancje une altre robe. Stant che si sin inacuarts che la conte in pdf e je biele di stampâle ma je dificile di lei sul telefonut, **la nestre Sartore e sta metin adun la maniere di metile intun formât che al ledi ben di lei ancje sui telefonuts**. Insome... dut chest par visâus che, se par câs no sês iscrits ae nestre liste, o vês inmò 4 dîs di timp par ricevi il nestri regâl di Fevrâr!

Cemût! Baste meti non e direzion di pueste eletroniche tal Corinus daûr vie mail e us rivarà un leam di fracâ te pueste eletroniche (e ocjo come simpri al antispam).

Al è dut... par cumò. Sparniçait, sparniçait, sparniçait!